



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Saudi oil refineries nung khaloktsüba missiles khazüka yok

Japan forward Maeda-i Ipswich nungi asayatsü



VOL. XXIII ISSUE NO. 283 (ADOK 283) DIMAPUR AMUNGNÜ (SUNDAY) CHITENI (JULY) 26, 2026

₹ 5.00

Pralhad Joshi-i Dharmendra Pradhan melenzüker

New Delhi, July 25, 2026 (Agencies): Dharmendra Pradhan-i mapa nungi anenba sülen Centre sorkari Union minister Pralhad Joshi nem Ministry of Education repsema inyaksü nunglochtsüogo.

President Droupadi Murmu-i Pradhan indang shidi agizükba sülen tanü nikongdang Joshi shimba osang metetdachtsüogo.

Arishi küm 57 tain Pradhan-i tanü shidi züluba nung iba tensa ajanga linük anemertem nem tajangzük magütsütsü atema menden nungi alur ta shia lir.

"Küm 40 tema ni kaketshirtem, tesayurtem aser educational reform atema bendanga agüja inyaka arur. Linük ka tashi aibaji takang, ajak adenba aser mangdang aliba education system ka aliba ajanga lir ta ni teti amanga arur" ta Pradhan-isa shidi nung shia lir.

Pralhad Venkatesh Joshi ya tang Union Minister of Consumer Affairs, Food and Public Distribution & New and Renewable Energy lir aser paisa education ministry repsema inyaka atatsü.

BJP Nagaland-i Congress aser opposition aitsür

Dimapur, July 25, 2026 (TYO): Congress aser tanga opposition party temi Parliament agia moudachtsüi meinprongba atema tebilemtsü abener ta Bharatiya Janata Party (BJP) Nagaland-i metetdachtsüogo.

Parnoki meinprongba ajanga Parliament tiptema magiteler aser kaketshirtem dak kongshiba onüktem den külemi linük dak sendakba tebilemtsütem benoka melemsatepteter ta Media Cell, BJP Nagaland-i sangdong ka nung ashi.

Parliament ya olemtepdak tematiba sabang lir saka olemtep nung shilem agitsü melena opposition-i meinpronger aser iba ajanga linük nem ozüngi melaba ama tebilemtsü onüktem lemsateptsü maongka magütsür ta parnokisa metetdachtsü.

Congress lennir Rahul Gandhi-i Prime Minister'er kima nung mener lungkak aitba aitsür kechiyong iba ya NEET examination dak sendakba onük nungi tajangzük angutsü atema inyakba liasü ta BJP Nagaland-isa ashi.

Timi lungkak aittsüba ya

ozüngi melar aser temeten lir saka kaketshirtemi lungkak aيتدang ozüng alema inyaksangshiba atema tebilemtsü abener. Ibala inyakim ajanga democratic tangatetba agiener aser kaketshirtem dak kongshiba tebilemtsütem den pilar ta parnokisa metetdachtsü.

India sorkari examination system akangkanga ayutsü tenangzükba lir aser sorkari mapang shitak nung teinyaktsütem inyakogo aser temetongshitem süogo ta parnokisa shisem.

Public-i tatidang maparen nung tamang akatsü atema sorkari NEET examination tanaben agishio go aser merit nung ajemdaker takokertem shimogo ta BJP Nagaland-isa metetdachtsü.

BJP Nagaland-i ochishiba aser kaketshirtem ajungtsü atema bendanga agüja inyaksü nenshir. Onokisa political party tem aser sendaktepa alirtemdang kaketshirtem aser linük asoshi tebilemtsütem timi aser tajung tangatetba agi inyaka aotsü ayongzükogo.

Angetyong Development Board-i ayongba Livestock Insurance Scheme sentong aka

Mokokchung, 25th July (TYO): Department of Animal Husbandry & Veterinary Services, Government of Nagaland den külem sür Angetyongpang Development Board (ADB)-i ayongzuka 'Livestock Insurance Scheme' tenzükba den iba dak sentakba nung shisatokten sentong ka Mongsenyimti village council hall nung kaogo.

Iba sentong nung Angetyongpang Assembly Constituency kübok aliba yimtsüng aser town balala nungi yimsüsür, lenirtem, party tenzüker, aser department nungi ketdangsürtem densema liasü.

MLA & Advisor for WRD, Govt. of Nagaland, Tongpang Ozüküm-i jembidang, iba ya talangka nungi yongya ataba sentong ka aser ibai constituency

sanger talisa shiruru metsürtem atema kanga dang nüngdakba mapa ka lir. Anungji constituency sangeri iba maongka ya tagi shia agitsü asoshi ajungshia liasü. Mezüngren (1st phase) nung nisung kwi shimdir insurance senji pai agütsütsü, ta metetdachtsü.

A.H & VS Department, Director Dr. Kuokehebi Gwirie-i jembidang, wara balala ajanga Nagaland nunga küm ishika jakdang kisetshiruru tesama ajuruba indang asadangra, sen crore 200 dak tali adoker. Asen state nung kisetshiruru metsüba ajanga rongsenkettsüng nung shilem tulu agir. Anungji, iba scheme ya Nagaland asoshi tongtibang ta angateta küm talangka meranga aliba tawa tanü nungi mapa kümteter, ta metetdachtsü.

(Maneni tapak 2 nung...)

Nagaland nung mezüngbuba Academic Staff College lapokogo

Dimapur, July 25, 2026 (TYO): International University, Chümoukedima nung Nagaland nung mezüngbuba Academic Staff College lapokogo.

Nagaland nung teacher education aser professional development programmes angütsü atema iba College lapoker.

"Iba Academic Staff College ajanga tesayurtem nem professional development, pedagogical research aser lifelong learning agütsütsü. Iba ajanga tesayurtem tajungba akümtsü aser kaketshirtem asoshi tarutsü tajung yangertsü" ta Nagaland Governor Kishore Nand Yadav-i ashi.

Academic Staff College lapokba ya tesayurtem renlokba nung tongtipang alizüng ka lir aser iba ajanga university mashii ka nung faculty jenjang tajungba akümtsü. Iba ya academic training angudak dang masü saka temeket aliba loktitem asoshi diagnostic centres ama asütsü ta paisa ashi.

"International University, Chümoukedima ajanga Northeast nung international standards rejutem lapoktetsü ta sayuba atema tenütsang agütsür. Külen kaketshirtemi mapa bushirtem masü saka entrepreneurship, innovation aser ethical leadership nung ajemdaker mapa agütsürtem asütsü ayongzükur" ta Governor Yadav-isa ashi.

Paisa faculty züngsemtem dang Academic Staff College tajungba ketdangsüa aotsü aser Nagaland nung nüngdakbatem nung amendaker research aser teaching ajungkettsü ayongzükogo.

"Iba college nung short-term aser long-term teacher education programmes agitsü. Item ya face-to-face, online aser hybrid modes ajanga agitsü" ta Academic Staff College Director, Prof Zavisé Rume-i ashi.

Academic Staff College-isa faculty tasen atema anogo 30 nü induction aser orientation programmes agitsü, tang teinyakdak

tesayurtem asoshi anogo 15 nü refresher courses agitsü. Maneni Faculty Development Programmes (FDPs), seminars, workshops, conferences, symposiums, panel discussions aser focus group sentong balala agitsü ta paisa metetdachtsü.

College-isa linük nung Academic Staff Colleges aser teacher education institutions den yaritepa research, internships aser academic exchange programmes agitsü ta Prof Rume-isa metetdachtsü.

"International University, Nagaland nung Academic Staff College lapokba ya kanga tongtipang mapa ka aser iba ajanga tesayurtem alima ainba den külemi anidachtsü" ta Law & Justice and Land Revenue Advisor TN Mannen-ia ashi.

"Shisatsü kanga ulua akümer aser artificial intelligence kanga inloker anungji maneni angazütsüji kanga tenüngdachtsü kümogo" ta TN Mannen-isa ashi.

Tzünglu 500% talila aruba agi Upper Assam metsüngbang: CM Sarma

Guwahati, July 25, 2026 (Agencies): Nagaland aser Assam kübok tesem kar nung tzünglu kanga aruba agi Upper Assam nung tzümetsüng tensa tulu ajuruogo ta Assam Chief Minister Himanta Biswa Sarma-i ashi.

July 19 nungi Charaideo, Sivasagar, Jorhat aser Golaghat district tem tzü agi metsüngbanga lir aser iba ya July 18 aser 20 tsüngda Assam, Nagaland, Meghalaya, aser Manipur nung tzünglu kanga aruba ajanga lir ta pai ashi.

Nagaland nung iba mapang above-normal rainfall 181% liasü

asir Mokokchung nung tzünglu 493% agi talila aru ta CM Sarma-i Hokolbarnü ashi.

Wokha nung tzünglu 108% above-normal aru aser Mon nunga 45% agi talila aru ta paisa metetdachtsü.

Assam kübok Charaideo nung tzünglu 436% aser Sivasagar nung 134% talila aruba ajanga tesem ajunga metsüngbang ta Sarma-isa shisem.

Nagaland nung tzünglu kanga aruba agi Assam anüdoklen tsütsü tzü aika yimzuka alu aser kasa mapang Upper Assam nung

tzünglu kanga aruba agi Brahmaputra mobangdachtsü ta CM Sarma-isa ashi.

Brahmaputra nung tzü ulura ayimba agi Sivasagar aser Charaideo district tem nung ayongtem nung tzü yima maluba agi metsüngbang ta paisa ashi.

Assam nung tzümetsüng tensa tajungba kümdar aser iba ajanga rescue & relief teams-i tesem tonga moutetdaki oteter ta CM Sarma-i Honibarnü ashi.

Tang tashi nung tzümetsüng lendong balala nung tastir ajak agi 52 kümogo ta paisa shisem.

OKM-i kaketshirtem nem angati sen senpet agütsü



Ongpangkong Kaketshir Mungdang Mission Vision-2045 senpet agütsüba sentong temer kelen senpet agizükertem, sentong meraketsür Wb.Daochier I.Imchen, OKM Lenirtem aser sentong nung shilem agirtem külemi tangokba noksa.

Mokokchung, Chiteni/July 25 (TYO): Ongpangkong Kaketshir Mungdang-i(OKM) achayanga OKM Mission Vision-2045 senpet agütsüba sentong tanü Ongpangkong Salang Mokokchung nung kaogo.

OKM Mission Vision-2045 ajanga iba senpet ya kaketshir degree balala azüngertem nem agütsü aser iba senpet ya taoba 2025 küm nungi tenzuka kaketshir 2 nem agütsür aser taküm 2026 küm asoshi Khensa Kaketshir Telongjem nung

Kr.Arizongla Leo aser Meküli Kaketshir Telongjem nung Imlijungla tenati agizük aser taruba(2027) küm Chuchuyimpang Kaketshir Telongjem aser Aliba Kaketshir Telongjem-i agizüktsü.

Ongpangkong Kaketshir Mungdang Mission Vision-2045 senpet agütsüba nung yarisema aser talisa Ongpangkong kaketshirtem ajungshitsü tangatetba nung Hon'ble Advisor for Information & Public Relations and Soil & Water

Conservation Wb.Daochier I.Imchen aser par kibong 2027 küm kaketshir-2 aser 2028 küm kaketshir-2 yaritsü aser iba ya pari OKM Mission Vision-I agütsüba senpet ama agütsütsü aser iba senpet ya 2027 küm asoshi Kupa Kaketshir Telongjem aser Aliba kaketshir Telongjem-i agizüktsü. Aser 2028 küm asoshibo mapang tatong nung OKM Mission Vision-2045 luden ajanga shimteta agütsütsü sentong lir.

(Maneni tapak 2 nung...)

Nagaland Angh-i Kargil Vijay Diwas bike rally tenzüksü



Kohima, Chiteni/July 25 (TYO): Kargil Vijay Diwas küm 27 ajungba bilemteta Inspector General Assam Rifles (North) ajanga bike rally ka ayongzüka liasü, koba 1999 Kargil War mapang tasü tait sepaitemi takum bendanga agütsüba nüngtem nung küm shia July 25 nü iba anogomung amunger.

Iba rally ya Nagaland nungi Captain Neikezhakuo

Kenguruse, MVC (Posthumous) nüngtem nung ayongzüka, shiba Kargil War mapang tasü aitiba tanü tashi tushia amshir aser nüburttem ajungmesor.

Nagaland Angh Nand Kishore Yadav-i iba rally ya Assam Rifles Garrison Helipad, Kohima nungi tenzükja liasü. Iba sentong nung Angh-i Captain Kenguruse'er tsürabor nem tetushi agüja liasü, kong

Inspector General, Assam Rifles (North), Major General Harinder Singh Mavi dena liasü.

Iba rally nung ex-servicemen, Kohima Mods Motorcycle Club, Royal Sons Nagaland aser civil society tem dena liasü. Rally ya Nerhema nung aliba Captain N. Kenguruse, MVC (Posthumous) Memorial nung tembanga liasü.

ADC Chiephobozou-i HLO mapang shidak nung tembangtsü tuyu

Dimapur, Chiteni/July 25 (TYO): Chiephobozou Sub-Division atema Census 2027 Weekly Review Meeting ka July 23, 2026 nü ADC, Chiephobozou indang office chamber nung mena liasü.

Iba senden ya Additional Deputy Commissioner, Chiephobozou, Vekusheyi Rhakho, NCS mendenpuba sür amen, kong Enumerators, Supervisors, Field Trainers aser Charge Officers temi mapa

meranga inyakba atema pelaba lemsatop aser House Listing Operation (HLO) mapa tem mapang shidak nung renemtsü totuyuba agüja liasü.

Iba senden nung Sub-Division kübok Chareges asem nung Supervisory Circles aser HLBs ajunga indang HLO mapa tejangja asadanga repringtepa liasü. Iba senden nung Census Charge Officer for Botsa and EAC Kohima, Ane Khieya; Urban (Town) Charge

Officer for Chiephobozou and EAC Chiephobozou, Viketoulie Meth nunger aden.

Field Trainers Alemsonglia Jamir, Ruthla Sangtam, Supervisors, Technical Assistant ajunga aser census mapa inyakertem dena liasü

Taruba senden ya July 29, 2026 nü amentsü ta metetdaksü aser iba senden nung Charge Officers, Field Trainers, Supervisors aser Enumerators ajunga adentsü ayongzüka liasü.

Angetyong Development Board-i ayongba... (TAPAK 1 NUNGI...)



Department of A.H & Veterinary Services den yaritepa Angetyongpang Development Board-i shiruru metsürtem atema Livestock Insurance Scheme tenzükba sentong ka nung MLA & Advisor Tongpang Ozukum den A.H & VS Dept, Director, Dr. Kuokehebi aser shilem agia adenertem külemi tangokba noksa. (Mokokchung, 25th July, 2026)

Iba scheme ya National Livestock Mission (NLM) kübok aiter. Ibai shiruru metsürtem atema teyari aser tajangzüka agütsüba lenmang ka lir. Iba scheme ajanga 15% premium shilem shiruru metsüri agütsü aser tanüngba 85% premium shilemji central & state sarkar nungi teyari agütsür, ta pai ashi. Paisa iba insurance policy atema koma inyaktsü, inakyimtem, insurance meshiyim, shiruru kobasa insurance küboki maiter aser iba dak sentakba nung temetettsü tapu balala tatongi rasa-a ashi.

Paisa African Swine Fever indang ashidang, iba wara den rara asoshi India nunga mozü

ngutetogo, anungji, memenui mozüji market nung angutsü asoshi tang teinyakdak lir, ta metetdaksü.

Nagaland nung constituency board tenteter iba ama nüburttem jenjang ajungkettsü asoshi inyakba kangabo mangashi. Iba mapa yagi Angetyongpang constituency sangertem tejakleni aotsü nükla tulu angur, ta paisa achayangertem dang pelaba olen ka lemsatop.

Yashi tashi maparen ajak nung sarkar dak dang noklang nung noklang imlar asenok lia aruogo aser tanü tashi iba mulungsentsü nungi mepilateter. Akhibo MLA/Minister-temi nüburttem nüngdak peria repringa aru, saka tanübo

akhi ama masü maparen ajak züngzünga aor, anungji, tangar dak nentaker aliba shisatsü ya melenshitsüla, ta Angetyongpang Development Board Züngsem, I. Meyionen Jamir (CIC Retd.)-i metetdaksü.

Shiruru metsüba ya asen sobaliba ka lir, anungji, asenok achitsü atema dang mesüi tangar dang dena yoktetsüsa tulujunga metsütsüla. Tanü tenzükba scheme ya tajung saka yangi asenok teinyaktsüa kar lir, anungji, tashi anga-a iba scheme ya azüitsü merangdi, aser shiruru metsüa rongsenren ajungketba nung tatishitsü constituency ka südaksütsü pai ayongzüka.

Alinen alua Zunheboto nung nüburttem tzü agi rokonger

Kohima, Chiteni/July 25 (TYO): Tizu Bridge-Yezami Road nung July 20, 2026 nü alinen alua Zunheboto nung 150 mm water supply mainline ka kisüing aliba raksar jila nung tzü source maka timtemtar.

Er. Beto T. Jimo, SDO, PHED, Zunheboto ajanga ashiba agi, iba pipeline yangluba

maparen ita ka dak tema nung renemtsü, kechiaser pipeline aser lemanng kanga mejungi raksaba ajanga iba tesemi moteter.

Lenmang yanglushia pipes temelen aruba sülen ang pipeline yanglushi tenzüksü ta pai ashi aser nüburttem dang aremzüka atatsü ayongzüka liasü.

DDMA Longleng ajungben senden amen

Dimapur, Chiteni/July 25 (TYO): District Disaster Management Authority (DDMA) Longleng ajungben senden ka EAC Yachem, C. Tsalmise Sangtam lenisüba kübok July 24, 2026 nü Deputy Commissioner, Longleng indang Conference Hall nung mena liasü.

Iba senden nung mendenpubai DDMA kübok HoDs ajunga dang yimtsüing shia ki o jen, kiset shiruru raksaba osang tejangja bendena Home Department-i format agüja aliba nung shidak inoktsütsü mapa nungloktsü.

Mendenpubai lokti dang DDMA ajanga DC Office nung District Emergency Control Room amenokba indanga metetdaksü aser HoDs ajunga dang asü-amaba osang agütsütsü ayongzüka liasü.

Paisa lemanng yanglushiba maparen hopta ana nungi asem tashi agitsü aser totzü aser tanga nüngdakba osettema kanga ajema lir ta metetdaksü.

Lenmang tem meyanglutet tashi item resources kanga kumdanga amshitsü aser departments balala nem metetdaksütsü EAC Yachem, C. Tsalmise Sangtam-isa ashi.

G AR (North)-i Phek semdanga CSOs den sensaksem aka

Dimapur, Chiteni/July 25 (TYO): Inspector General Assam Rifles (North)-i Phek Battalion semdanga security tensa repringshim aser Assam Rifles-i stakeholders den amalitepba nung tashi itshitsü merangba nung shilem ka ama Civil Society Organisations (CSOs) den ajurutepa sensaksema liasü.

Iba mapang region nung yimjung, security aser mapang talangka atema azükaru lidaktsütsü asoshi lokti den maneni inyaktsü asoshi paisa

metetdaksü.

Sensaksemba mapang IG-i yimjung aser terenlok atema stakeholders ajunga arok khuret aliba indang jembia liasü.

Tebilemstü balala benteta kati ka dak tamang katempa aser amalitep akatsü atema Assam Rifles, CSOs aser nüburttem temulung ka sür alitsü tongtipang ta pai ashi.

Iba mapang region nung nüburttem ajangzüksü, security aser terenlok asoshi tangatetba tajung lemsateptsü maongka agüja liasü.

OKM-i Ongpangkong kaketshirtem... (TAPAK 1 NUNGI...)

Tanü iba sentong Meraketsür Wb.Daochier I.Imchen Hon'ble Advisor for Information & Public Relations and Soil & Water Conservation-i jembidang Ongpangkong Kaketshir Mungdang-i iba senpet agütsüba ya kanga dang sarasadema mangdangtulu nung kenü anogobo nenoki meyipa aruagi nüburt talisa Ao kin aser Naga nunger tenzüksü ta asüba tamang nung agütsür, anungji senpet agizükertemi ibaji angatettsü nungtaker aji asünung nenoki iba senpet ya pongpa pongpa-a magitsüla ta senpet agizükertem ajungshi.

Lanur asüba mapang nung tau aika inyaktsüsa tensa ajurutsü saka nükjidong takang yur inyaka jajatsüla, lanurtemi mapa tajung inyaktsü asoshi metsübuttsüla, kechiaser inyaka aoba mapang nung aibelena ajurutsü saka iba mapang nung melenshitsütsü aser yaritsü asoshi taintem aser tsüraburtem lir ta Advisor Daochierisa adenshia aliba kaketshirtem ayongzüka jembi.

Iba sentong Kr.Temjennaro Longchar-i ketdangsüa aniba den Artang Baptist Arogo Pastor Rev.Dr.Bendang Longkumer ajanga Tsüngrem temoatsü meshia sarasademer sentong tezük aser OKM Tir Sb.Tongpangmangyang Kichu ajanga tarurtem pela agizüka jembi, Dr.Yutsüng Imchen OKM Mission Vision Luden züngsem ajanga achayanga 2026 küm asoshi senpet achayanga agütsü.

Sentong nungsa Ongpangkong Tetsür Mungdang Tir Wt.Asangtila aser Asetkong Kaketshir Telongjem Mungdang Tir Sb. Bendangkumzüka Aier, OKM Mission Vision-2025 mezüng senpet agizükter Kr.Etidangla aser Sb.Moarenba aser OKM Shisaliok Zülur Sb.Alemtuba Imsong parnoki shilem balala agia jembiba den Soyim Shisaluyimer Telongjem ajanga ken taju ka aten aser Longmisa Baptist Arogo Pastor Rev.T.Toshi ajanga Tsüngrem nem tenüngsang agüja sarasademer sentong tembanga liasü.

Dharmendra Pradhan-i menden toktsür; CJP-i longkak aitba anenogo



New Delhi, July 25, 2026: Honibarnü Union Education Minister, Dharmendra Pradhan menden nungi anenba sülen Jantar Mantar nung Cockroach Janta Party (CJP) otongdar, Ashutosh Ranka-i osangbenertem den jembidang tangokba noksa nung angur.

New Delhi, Chiteni/July 25 (Agencies): Honibarnü Union Education minister Dharmendra Pradhan-i menden toktsüba sülen Cockroach Janta Party (CJP) tentetsang Abhijeet Dipke-i,

"Asenoki takok nguogo. Dharmendra Pradhan-i menden nungi anenogo. Nenoki metsübura, nenoki iba sorkar matsüngdang mapudakra asenoki lenir mashie ka anendaktsüsü akok, ta iba ya ajanga kuli sayur," ta metetdaktsü.

Cockroach Janata Party ya taküm May ita nung ang tenteta liasü, ajisüaka parnoki ita ana tsüngda Union Minister ka menden nungi anizüktetba ya atamata masü, kechiyong tesüiba küm 12 tsüngda opposition party temi meinyaktetba ka ita ana tain party kati inyaktetogo.

Dharmendra Pradhan-i X ajanga, "Jantar Mantar aser linük tesem balala nung tensa ya linük anemba teloktem nem ambangyim mesüdaktsütsü. Linük telongjem ya merak sai alitsüla. India nunger kaketshir ajaki tarutsü nung legal tsütsü timtem majurutsüla," ta metetdaktsü.

Tesüiba mapang Lalit Modi dak sendakba ken o nung Congress-i Lalit Modi linük nungi jena yokba atema BJP nung tongti lenir kar anendaktsütsü atema takhangba agüja liasü; iba mapang nungji Union Minister Rajnath Singh-i, "Yangi Minister temi manener. Iba ya UPA sorkar masü saka NDA sorkar," ta jembia liasü.

2004 küm nungi 2014 küm tashi Centre nung Congress-i aniba UPA sorkar liasü, aser iba

mapang nungji ochimashi mesüra pei mapa nung tamakok aludaktsüba nung ajemdaker minister tem aikati menden nungi anena liasü.

Ajisüaka tesüiba küm 12 NDA sorkar mapang nung mangatetpet aika lia longkak ait, saka minister tem menden nungi manendaktsüteti aruogo.

2021 küm nung ang Coronavirus tensa junga ketdang mesütetba atema Union health minister Harsh Vardhan-i menden nungi anena liasü, ajisüaka ibajibo Modi-i aniba cabinet asetshia minister 12 anentsüba dak sendakba shilem ka dang liasü.

Iba mapang nungji Ravi Shankar Prasad aser Prakash Javadekar nata menden nungi anentsü, ajisüaka ibaji opposition-i longkak aita takhangba agütsüba agi anentsüba masü.

NEET-UG exam paper leak asüba nung ajemdaker CJP tentetsang, Dipke leniba nung kaketshirtemi tesüiba anogo aika Jantar Mantar nung longkak aita aruogo. Minister menden nungi anentsütettsüsa Dipke-i kaketshirtem ayongteta liasü; iba denji külemi climate activist Sonam Wangchuk-ia tesüiba anogo 26 tashi parnok pusema lumia longkak aitba ajanga kaketshirtemi takok nguogo.

Brihostibar ayaterm mapang nung Sonum Wangchuk-i lumia longkak aitba anen; iba mapang nungji pa den Union Minister ana- JP Nadda aser Jitendra Singh na liasü.

Wangchuk-i lumiba anenbaji CJP-i pelaa agizük, ajisüaka Dharmendra Pradhan-i menden nungi manen tashi CJP-i maneni

longkak aittsü, ta metetdakja liasü.

Pradhan menden nungi anenba sülen Wangchuk-i X ajanga, "IBA YA DEMOCRACY TAKOK KA LIR. Lenmang nungi democracy takok anguba. Iba ya yimjung, tarezmük aser matsüngshiba takok ka lir. CJP, linük nung Gen Z lanurtem nem tenüngsang agütsür aser linük tesem ajaklen metsübui nokdakba sensotem dang pelar," ta metetdaktsü.

Taküm May 15 nü ken o ka angadanga mapang nung Chief Justice of India Surya Kant-i, mapa manguba lanur kar journalists aser RTI activists akümer aser social media ajanga ajak aittsür, ta metetdakja liasü. Paisa mapa manguba lanurtem 'leplo' den medemdanga jembia. Anogo ka lirbo Abhijeet Dipke-i asayamenü ama Cockroach Janata Party tenzüka liasü.

NEET-UG paper leak asüba atema kaketshirtemi ola adokba mapang ka nung June ita tetenzükeln Dipke US nungi India-i meyipa aruba sülen pa leniba nung Jantar Mantar anasa longkak aita liasü.

Nisung aikati Dipke ji online ajanga pusemer dangashi atangji nungbo pa pusemer malitsü, ta bilem. Ajisüaka Wangchuk densema lokti temeden atema inyakterem aikati pa pusem.

July 25 nü Dharmendra Pradhan menden nungi anenba sülen Dipke-i X ajanga Chief Justice of India dang, "Asenok dang Cockroach (leplo) ta ajaba atema ni CJI Kant dang pelar. Nai onok dang cockroach maja asübo Pradhan menden nungi manenla," ta metetdaktsü.

Maharashtra TET paper leak asüba nung tongti aibelener puogo

New Delhi, July 25 (Agencies): Honibarnü Bhiwandi Police-i Maharashtra Teacher Eligibility Test (TET) paper leak asüba ken o nung tongti aibelener, Bijendra Kumar Gupta puogo.

Bijendra Kumar Gupta ya Bihar yimtiba, Patna nung lia apuba sülen pa aser pa den külemi inyaksemer, Indrajeet Singh na Bhiwandi-i anir ogo.

Osang angazükba agi, Deputy Commissioner of Police (DCP) Zone-2 office nung police-i tena dang asüngdangya tenzükogo.

Police-i ashiba agi, TET paper leak asüba nung tongti aibelensangji Bijendra Gupta lir. Pa tesüiba ita ka jungnüa jenshia liasü.

Iba ken o nung tang tashi nung nisung 14 puogo.

Maharashtra TET-2026 examination ya June 28 anogo nung state tesem balala nung exam centres 1,028 nung agitsü liasü, ajisüaka exam magidang question paper kar leak asüba police-i jangjaba sülen states sorkari iba tatidang thinen.

June 27 nü Bhiwandi nung nisung kar ket nung TET question paper lir, ta police nem osang metetdakja liasü.

Iba osang nungji ajemdaker Bhiwandi Police-i mita aodang paper kar angu. Iba sülen police-i Maharashtra State Examination Council nungi ketdangsertem jaoka iba paper ji sayuba ajanga paper leak süogo ta jangja. Leak asüba question paper ji reprangshiba mapang nung shidakba question paper (TET 2026 question paper) nung aliba question aika aliba bushitet. Iba sülen ken o ka benoka bushisüngdang tenzü.

Special Investigating Team (SIT)-i iba ken o bushisüngdangba mapang nung Agra nung aliba printing press ka nung inyaker nisung asem July 5 nü pua liasü. Kumar jenshia senzüba mapang nung nisung asemjibo pua Bhiwandi court-i anir ao.

Maharashtra state examination council-i, MAHA TET question paper renemdang security dak sendakba inyakyim aika benshia liasü ta metetdaktsü, ajisüaka iba paper leak asüba jangjaba sülen parnoki tatidang thinen.

MAHA TET tatidang agütsütsü atema tesayurtem densema candidate ajak agi lakh 4.28-i tenüng agüja liasü.

July 27 nü Lok Sabha nung sorkari anti-paper leak Bill ka benoktsü

New Delhi, July 25 (Agencies): Public Examinations (Prevention of Unfair Means) Act, 2024 yanglushitsü atema Hombarnü Lok Sabha senden nung sorkari Bill tasen ka benoktsü; iba bill ji agizüka ozüng kümra iba ozüng kübok paper leak asüba ken o nung aibelenerkem küm 10 tashi tepuokdak ayutsü aser senchi lakh 50 tashi achitsü.

Ozüng tejenba (2024 Act) kübok paper leak asüba ken o nung aibelenerkem küm 5 tashi tepuokdak ayutsü aser senchi lakh 10 tashi achitsü lateta lir.

Public Examinations (Prevention of Unfair Means) Amendment Bill, 2026 kübok aibelener 'service providers' dang senchi crore 5 tashi achitsü akok.

Iba dak alia exam ketdangsüa agitsü aliba nung indokba senotsüji-a parnok dak (service providers) nungi alangzüktsü, aser public examination ketdangsüa agitsü atema küm 8 tashi temelaba magütsütsü. 2024 küm agizükba ozüng nungbo senchiji crore 1 tashi dang lir aser küm pezü tashi dang tatidang ketdangsüa agitsü atema temelaba magütsütsü. "Service provider" tetezü

agency, organisation, tentet, associations, business entity, company, partnership mesüra single proprietorship firm asütsü akok, iba nungji associates, subcontractors aser computer resource agütsürtem densema lir.

India nung Public examinations ji Union Public Service Commission, Staff Selection Commission, Railway Recruitment Boards, Institute of Banking Personnel Selection, Central sorkar Ministries mesüra Departments, subordinate offices aser National Testing Agency (NTA) lir, aser item ajakji iba ozüng küboki aittsü.

Iba bill ya Hokolbarnü Union Cabinet nungbo agizükogo aser taruba Hombarnü Lok Sabha senden nung benoktsü tebilemba lir.

Iba Bill ya Honibarnü Lok Sabha MP ajak nem lema agütsüogo.

Iba dak alia iba Bill nung Arrla tasen ka- Arrla 12 inoksema lir, aser ibaji item ama ken o tekeraba nung bushisüngdangtsü aser special fast track courts nung ken o angadangtsü atema lir.

Arrla 12 kübok item ken o bushisüngdangbaji ita ana tsüngda renemtsüla.



July 25, 2026 nü Bucharest, Romania nung Bucharest University of Economic Studies-i India Tir, Droupadi Murmu nem Honorary Doctorate agütsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, JULY (CHITENI) 26, 2026

Temulungjang temerük

Nisunger inyaksangshi aser libaliru nung tesüngmangtsü kaji asen mulungjangi kechi bilemer yamaji tenük agia angur. Ibaji shisatsü temerük aser tajung bilemertem asoshi temoatsü saka shisatsü memerük aser tamajung bilemertem asoshibo tejashitsüka asütsü. Tashitemeteteremi ashiba agi, asen kolok aser mulungjang nung tangar yimya indang bilemtsü aser tangoktsü tashi ka agüja lir, anungji alima kati aotsü asüandang asen ket nung iba lima map bener apuso ama, kechi mapa nung südir süaka asenok ket nung temulungjangi bilemba map ka lir. Aji oda, Iba map-ji repranga dang asenok aotsü aser aseni lenmang memetetaka iba map jagi anitsü. Ibaji jangratemtsüka saka ano tajidaktsüka lir. Tatishitsü agi, asen ket nung aliba mapji meshitakra aseni tongnüba tesem matongtsü. Tetezü aseni abenba mapji tai süra tai lenmangi anitsü. Aji oda, Khristan taküm nunga asen ket nung bena aliba map-ji kanga tongtibang asütsü. Ibayongji, Laishibai ashir, temulung merüka alirtem tsüngdang ajak merüka angur saka memerükertem tsüngdangbo kecha temerük maka. (Tita 1:15). Asen temulung nung kechi bilemdir, ibaji aseni abenba mapji lir, anungji aseni tangar dak tamajung dang ajitetra asen ket nung aliba mapji tamajung bilemba map asütsü. Asenoki kechi bilemer, ibaji asen taküm yimya agi sayur. Asenoki beshiba jakla, jembiba o aser taküm yimya agi asenoki komaka bilemer, ibaji tangar tsüngdang sayua adoker. Aji oda, asen mulungjang nung tenükmerem, mokokaji aser ochimashi temenentem aliba agi, asenoki tangar taküm nunga kasa temenentemji dang angur. Iba jagi asen mepelar aser tangar den meputepteter. Iba ama temulungjang memerükba agi teti tangar dak tamajung reprangteter aser aitsür. Ajisüaka, asenok nük nung anak ia yur, kodaser tangar nük nung anak ia aliba endoktsütettsü (Luke 6 :41- 42). Asenok mulungjang merüka lira, asenoki tangar dak tamajung mereprangtettsü aser tangar dak mulung lemtettsü. Aiben asenok ochimashi asüba agi asenoki tangar daka temulung malemer aser tenüngsang agütsütsüa tajung tilaka ta mangur. Ajisüaka, asen mulungjang merüka lira, Tsüngremi koma tangar dak repranger yamaji asenokia angutsü. Asen kiyongerbo mesüra asen adianu aser medemertembo nisung tajung ser nung asenoki temulungjang nung parnokji majung ama bilemba agi asen nükdang majung angur asütsüa akok. Aji oda, asen tenük nung temenen aliba agi tangar dak tajung alibaji reprangtettsü makoker. Anungji, Laishibai ashir, "Tenükji temang milen lir. Nü nük junga lira, nü mang ajak tesangwa agi asüngtsü, saka nü nük mejungi lira, nü mang ajunga tamang agi sünga alitsü." (Mathi 6:22). Atangji, temulung nung abenba mapji asen tenük agi angur asünungji, asen taküm pelaa alitsü aser jashia alitsübaji aseni asen mulungjang nung bena aliba map dakji dang keta lir. Aji oda, asen tenük agi anguba agi asen mepelai kümra mesüra asen tenük agi anguba tamajungtem ajanga tangar den meputepteti lira, Tsüngrem dang temulungjang tasen aser temerük ka meshitsü kanga nüngdaker ta aseni angatetdi. Kü mulungjang merüktetjang aser kü dak tamajung bilemba aser tangar dak tamajung anguba memerükba mulungsentsü endokjang ta sarasademdi. Ni tangar indang tamajung bilemba map bena aliba ya tajung bilemba map agi melenjang ta sarasademdi. Tsüngremi temulungjang temerük aginer aser asenoka asen mulungjang merüka ali nung dang pelaa alitsü. Temulungjang ya tepela apokdak, anungji temulungjang merüka lira, iba nung jagi apokba tzüjia temerük, tajung aser tepela tzü asütsü.

OLEMSABANG

Konang-nungsang agütsütsü tim nungpo agütsütsüla

~ L. Kika Pongener

Alima nung kechi mapa sudir suaka; tasen ka tenzüka inyaksübaji mapa temela masü. Kechi mapa sudir suaka; mezüng tenzüka inyaksübaji mapa kanga temelabo masü. Maka aliba ka akatsübaji kanga mela-melarbo masü. Sensaker jenjang ka nungi takar akümtsü kanga temelabo masü. Asen Ao kin ya otsüla-oboula nunger mapang nungi alu meranga yimer chiyunga-jema lia aruba kin lir. Aji oda, alu tasen ka züsenteta inyaktettsübaji mapa kanga temelabo masü. Arem min temelem lep-poka chiteta moapu kümdaktsür; idakji tsük peroker; meranga inyaknungdang tsük junga tangteta tsük aika arohtsü. Akhi putu nung asen tsüraburtemi alu meranga yima asenok jenjang tajung kümdaktsüogo; parnokbo pei tenung zülutsüa memetet; saka asenok nem shisaliok agütsür; asenok azüngtsü aser zülutsü meteta kümdaktsüogo; aser iba jenjang tashi kümdaktsüba atema; asenoki asen tsürabur nem tenungsang agütsütsüla. Tanü asenok kar tulur, kar takar aser kar tulur-takar mesu-aka; anogo nung anaben chiyungtsübo ngua; pei poksung chiyunga-jema aliba ya asen tsüraburtemi asenok jenjang tajung kümdaktsüba ajanga lir. Anungji asenoki asen tsürabur nem tenungsang agütsütsüla. Koba linuk, koba yimtsüng aser koba lokti nung tenungsang agütsüba agi anung-akonga lidir; iba linuk, iba yimtsüng aser iba telok nungji yimjung, tesunep, telongjem malitsü aser azükaro malitsü.

Asen Aor Chungliyimti lima soyapokya-a sobaliba-a lir; iba nungjagi adoker; tang asenok aliba Ao lima tokong-tenem tobur tajung lima ya oboula nungeri yateta kümteter....Tzükong terok (6) aser yim paikati küma soyapokya-a sobaliba-a rena lia aotsüsa kümteta aser wazüka yutsüogo. Oboula nungeri iba tokong-tenem tobur tajung lima yateta, mesemteta, kümteta yutsüba ya mela-mela yateta aser kümteta yutsüba masü; parnoki pei taküm samatsü mapayui; Shidi scu, Keyi scu aser Ngum scu oktoker; timtem jenti agia yateta aser kümteta yutsüogo. Anungji tanü asen Aotsür Aor ajaki oboula nunger dang kanga pelatsüla aser tenungsang agütsütsüla. Aji oda, oboula nungeri iba Ao lima tokong-tenem tesadem, alima tajung ya yateta aser kümteta yutsüba agi....Asen Ao kin iba temoatsüji agia soyapokya-a sobaliba-a jangradema alir. Asen Ao kin Naga nunger kin ajak rongnung lenla ajak nung mezüngpur aser samanir kin ka akümba; Asen Aor Naga lima sorkar nung Chief Minister kümsuk (Term) asemben-pezüben tashi anitsü maongka anguba; Politician, yimsüsür aser alima lennir watsü-wabong tajung aika adokba; sorkar menden nung Chief Secretary-i anir Bereaucrate aser Gazeeted officer aika amenba; Assembly nung MLA-10 tashi amentsü maongka anguba....Item ajak ya oboula nungeri yateta aser kümteta yutsüba lima nung nutsüng-nubu jenti rena aoba agi; iba senmangji agia alir. Anungji Aotsür Aor tulu-tila ajaki oboula nunger dang kanga pelatsüla aser parnok nem konang-nungsang agütsütsüla.

Asenoki India nunger otsü nung züngdangra....India nunger British yimli talenba küpok lia aliba; Mahatma Gandhi-i anir British nunger nungi nujiso anguba ajanga India ya alima nung linuk (Country) ka aküm. Yongji, India nunger ajungai Mahatma Gandhi dang kin tebu (Father of the Nation) ta ajar....Aser aji tajatsü tim dang ajar. Tanü India lima nutsüng yongsuk Billion aika küma, tashitemeteter aika adokba aser takar linuk ka küma soyapokya-a sobaliba-a aliba ya.... Mahatma Gandhi-i anir Bristish nunger nungi nujiso anguba ajanga iba maongka nungji alir. Anungji Mahatma Gandhi-i anir nujiso anguba ya India nunger otsü (Indian History) nungi kodanga shinga-ia aidoktsü aser melenshitsü makok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

WCC nungi lenirtem telok kati Ukraine linük semdang



World Council of Churches (WCC) nungi lenirtemi Ukraine semdangba mapang Ukrainian Council of Churches and Religious Organizations (UCCRO) nung lenirtem den külemi tangokba noksa nung angur.

July 25, 2026: World Council of Churches (WCC) nungi teshimtet telok kati July 14-17 anogotem nung Ukraine semdanga Ukraine nung Arogo lenirtem ajuruogo.

Ukrainian Council of Churches & Religious Organizations (UCCRO) küm 30 ajungba mapang ka nung WCC-i Ukraine semdang.

WCC nungi lenirtemi UCCRO nung chair, Metropolitan Epiphany densema Arogo nung lenirtem aika ajuru. Ukraine nung amongba mapang piyong WCC-i linük nung rara anentsü atema jembiba den külemi timtemertem yaritsü atema ajungshi.

Parnokisa akokba tashi ken o jembiba ajanga rara anentsü merangsüla, ta ajungshiba den külemi tanepsüba aser teimla ministry ajanga parnoki Ukraine nung Arogotem nungiter, ta metetdaksü.

Ukraine semdang WCC lenirtemji- Rev. Prof. Dr Jerry Pillay (WCC general secretary); Bishop Prof. Dr Heinrich Bedford-Strohm (WCC central committee moderator); Rev. Karin van den Broeke (WCC central & executive committee member); H.E. Metropolitan Gabriel (Nea Ionias and Philadelphia, Church of Greece, WCC Commission of the Churches on International Affairs commissioner); Rev. Frank-Dieter Fischbach (Conference of European Churches general secretary) aser Marianne Ejdersten (WCC director of communication) nunger liasü.

Pillay-i, "Ano maneni Ukraine semdangba ajanga onok kanga ajungmesoogo. Nüburtem tasüaitba aser teimla mesamaba ajanga onok ajungmesor," ta metetdaksü.

Pillay-i, nüburtem rongnung anibelem aser tejashi lir, ajisüaka parnok dak tasütait tanela lir, ta ashi.

Pillay-i, "Onoki Arogo nung lenirtem, Ukrainian Council of Churches and Religious Organizations (UCCRO), sorkar ketdangsertem- Olena Kovalska, Deputy Head of the President's

office aser Viktor Yelenskyi, Head of the State Service of Ukraine for Ethnic Policy & Freedom of Conscience aser nüburtem ajuruogo," ta metetdaksü.

Paisa, "Onoki tang tensa osang metetpelaogo aser otsütem angaba ajanga onoki kanga tongtibang osang kar metetogo," ta metetdaksü.

Pillay-i, WCC lenirtemi UCCRO lenirtem den parnok küm 30 ajungbamong among, ta ashi.

Paisa, Ukraine nung yimsü balala nungi lenirtem longjema aliba ngua pelar; parnok longjemer tenzüka mapa inyaker, ta metetdaksü.

"Onoki Ukrainian Orthodox Church aser Orthodox Church of Ukraine den tebilemtsü onük balala lemsatop, sorkar ketdangsertem den Arogo tesendaktep aser tawa sorkari yimten aser yimsü dak sendakba nung ozüing tasen kar benokba atema jembio. Onoki tebilemtsü onük balala lemsatopba nung ajemdaker sorkari telangzüba agütsü aser UCCRO-ia sorkari benokba ozüing tasenbaji Ukraine nung yimsü temeden anema masü ta shiogo," ta paisa metetdaksü.

Pillay-i, "Rara aliba mapang ka nung WCC-i Ukraine semdangba ya tasütait mapa ka ta aikati onok dang ashi. Onokbo tekeraba nung meyipa oadoktsü saka nenokibo anogo shia item tebilemtsü maneni ajangshitsüa akok, ta onoki langzüa liasü," ta ashi.

"Ozüing alema raraba anema Ukraine-i nokdakba nung WCC-i maneni yimsü balala amangertem aser Ukraine nungertem nungittsü. Nisung jenti asüba, teraksatsübatem aser rara ajanga takoksa atema onoki sasa bilemtsür. Ukraine aser alima nung yimjung atema onoki teimla nung sarasadema inyaksü," ta Pillay-i metetdaksü.

Prof. Dr Heinrich Bedford-Strohm-i, "Tekümdangtsü maneni sangdongba aser Russia nunger missiles den drones agi maneni amokmerenyonga Ukraine nungertemi kecha masü ama

alitsü meranger. Ajisüaka onok sensaksemba mapang nung parnok küm pezü tashi ajangshia aruba timtemji onoki rajemogo," ta metetdaksü.

Bedford-Strohm-isa, Arogotem aser yimsü dak sendakba organizations longjemer Ukraine nunger melung süngzüksütsü aser nungita yaritsüji kanga tongtibang, ta ashi.

Ano külen tanga osang ka nung, taoba ita WCC general secretary Rev. Prof. Dr Jerry Pillay leniba nungsa WCC-i Zimbabwe linüka semdangogo.

WCC-i Zimbabwe nung Arogo nung lenirtem dang meimchir temeden atema inyaksü, Khristantem longjema alitsü aser kulisüba mapa inyaksüji kanga tongtibang, ta ashi.

June 24, 2026 nü Zimbabwe Council of Churches 48buba mungdang nung jembidang Pillay-i, "Onoki Arogo nung lenirtem, lokti tentettem, sorkar ketdangsertem aser lenirtem ajurutsü maongka anguba ajanga Zimbabwe tensa junga metetogo," ta ashi.

Paisa, "Zimbabwe Council of Churches-i sentong balala aser pastoral ministries ajanga kulisüba mapa jenti inyakba angashia pelar," ta metetdakja liasü.

Tesülen osangbenertem den jembidang Pillay-i, "Onoki Zimbabwe Council of Churches aser Zimbabwe nungertem dang linük telung nung aliba tebilemtsü onük balala atema inyaksü ajungshiogo, kechiyong ibaji ajanga dang Arogoi sayutsüingibaji mapa agi inyaka sayur asütsü ta shiogo," ta metetdaksü.

"Tang ama putu tamajung ka nung alima aser Zimbabwe den Yisu Khrista osang sangdongtsü atema Khristantem longjema alitsüji nüngdak," ta paisa metetdaksü.

Harare semdangba mapang nung WCC-i Zimbabwe Tir, Emmerson Mnangagwa aser Zimbabwe Ministry of Foreign Affairs nungi tongti ketdangsertema ajurua liasü.

ANO GO ABEN TSÜNGREM DEN

TZÜYIM YIPRU

"Saka Kibubai Yona meyoktsü asoshi angu tulu ka renem, aser angu pok nung Yona asemnü aser asem aonung liasü." ~Yona 1:17

Nisung ka office-i tera menur aritepa aor sürnung ano iba nepji taxi majuru nung office memenep. Pa kanga tezüdanga office jagi tetsüing agi taxi kar danga ngura ta sür aritaka aoba mapang, tatsüka tsüingta pa inyakba office building kiralongrartemi tayimtsü ajanga poksatsüba pa tenük agi angu. Ibai World Trade Centre liasü. Ashila pai taxi ka ngua mapang shitak nung office jagi ao asübo pa-a iba lendong nung taküm tembangla.

Yona tzüyim tiyong nung angu agi meyokbaji pa samatsütsü atema masü, saka pa tesamaba nungi kümzüksü asoshi liasü. Laishibai ashir Yona angu pok nung asem nü aser asem aonung sarasadema liasü. Teshinem menemba tesem ka süaka pa yangji taküm liasü. Rong nung külem amenertemi Yona tzü nung ajungoktsüdang Yona kopika tzüma nungji taküm litetla? Angu ji pa samatsütsü asoshi masü saka pa kümzüksü atema Tsüngremi renemtsüba liasü?

Asen taküm nung timtem ajakbo asen takoksa atema dangbo masü saka Tsüngremer tekümüzkba atema renemtsübatema alir. Yeremia 29:11 "Kechiyong nenok asoshi kü sentong ni meteta lir, oda tamajung asoshi masü, tesülen nenok nem teimla agütsütsü, yimjung indang tebilemba, ta Kibubai ashir." Angu pok nung kümzüka lidaktsüba atema tenüing sangdi.

SARASADEM:

Temeim Yisu, ni ne sentong mangatetdi khenkhen nemn??? aruogo, saka nai ni atema tajungtiba inyakba ni angatetogo. Amen.

Pastor Jin Mingri-i pa tepuokdak amongdang ajangshibatam lemsatop



July 25, 2026: China nung aliba underground Arogo tuluka nung pastor, Ezra Jin Mingri ita 9 tashi tepuokdak aliba sülen taküm July 3 nü chiokogo.

Arrshi küm 56, Jin Mingri anogo 266 tashi tepuokdak liasü.

Pa chiokba sülen pai underground Zion Church nung lenir 28 den külemi pa tepuokdak amongdang pai ajangshibatam lemsatop.

Pastor Mingri-i, tepuokdak takdang tilaka nung amongba sülen America nunger nüchiso anguba sülen küm 250 ajungba amongtsüsa pa talenba salaba ya shisa ramatsüsa lir, ta ashi.

Pai tepuokdak pakti nung mejangba, tali tatsük agi timtemba aser anogo shia menden teküprak nung mapang talanglang mendaktsüba lemsatop.

Paisa Zion Arogo nung lenirtem apuba sülen parnok chioktsü atema inyakba atema yimtenren lenirtem, yimsü temeden atema inyakterem aser Khristantem dang pelaba

lemsatop.

Par Arogo nungi züingsem 8 bo tang tashi tepuokdak lir, anungji parnok-a chioktsü atema inyakdaksüner, ta pai mepishia metetdaksü.

"Parnok mechiok tashi ni animesüingzüksü," ta pai metetdaksü.

Jin Mingri-isa, kenü anogo nungbo par linük nung tamangertem atema tensa tajungba akümtsü, house churches melatsü, Khristantemi sademsadema Tsüngrem külemettsü aser Khrista dak anguba teimla lemsateptettsü imlar, ta metetdaksü.

"Ni chiokba ya China nung tamangertem atema putu tasen ka tenzüker asütsü atema ni sarasademer. China linük temzüing nungbo yimsü temeden nangzüka lir. Ozü Arogo nung züingsem ajak chioktsü aser China ya nisung ajaki sademsadema Tsüngrem külemtetba linük ka akümtsü ni imlar," ta pai metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Zübu

(n) yiruba mong, yirua alidak (wound)

* Tanubusangi nok mekümdangi amshiba agi zübu tulu keta yiru.

Züdang

(v) tzü ama chiyongtsü lemdangba (share a drink)

* Asangba küna süngo züdanga ajem.

OLONG PAITEP # 7578

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLIN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7577 TELANGZÜBA**TIPLIN :**

2. Tatsü, 5. Jabaso, 6. Kotak, 8. Oro, 9. Ait, 11. Lungpok, 14. Pua, 16. Sen, 17. Mitsa, 18. Nükpok, 19. Asüng

langtsünglen

1. Ajuru, 2. Jaja, Toktep, 4. Tatsük, 7. Kesa, 10. Asem, 11. Leptsü, 12. Nepang, 13. Temko, 15. Aika

NAI-A YA METETTER

United States nung Emily Morrison ta ser shark biologist ka aser shark fossil diving tour company kiburi Guinness World Record ka yangluogo.

Maine nung alir Emily-i la temang nung sharks indang tattoos 106 yanglua lir aser la nem 'most sharks tattooed on the body (female)' naroküm agütsüogo.

Emily Morrison dang "Shark Lady Emily" ta-a ajar aser la arishi küm 8 asüdang Jaws movie reprangdang sharks kanga tsüba reprang saka tebui la dang shiruru meimtsü aser real-life sharks indang research agitsü ajungmesoba sülen lai sharks kanga meima aküm ta ashir.

Assam Minister Mahanta'er jalai NEET lungkak aitdak aden**Guwahati, July 25, 2026**

(Agencies): Brihostibarnü Guwahati nung NEET-UG 2026 paper leak atema lungkak aitba sentong ka nung Assam Cabinet Minister aser Asom Gana Parishad (AGP) lennir Keshab Mahanta'er jala Dibisa Mahanta-ia shilem agiogo.

Chachal nung lungkak aitba sentong nung Dibisa Mahanta-i kaketshirtem aser activists den külemi mener Cockroach Janta

Party (CJP)-i aniba sentong nung shilem agia lasü.

Dibisa-isa Prime Minister Narendra Modi anema yimyim ayimer ama social media nung prokshiba video tem nung angur.

Lai shilem agiba indang video clips social media nung prokshiba ajanga ashishitep ken o ka adoka jembir. BJP-i aniba Assam sorkar nung tebu minister ka süaka Dibisai-i iba sentong nung shilem agiba atema nisungtemi kanga

jembiteper.

Osangbenertemi Dibisa aser tebu Cabinet Minister Keshab Mahanta naprong den tongteptsü merangogo saka mekoktet.

Iba sentong nung Assam aser northeastern state tem nungi kaketshirtem, youth aser civil society züngsemtem aden.

Activist Sonam Wangchuk aser New Delhi nung lungkak aitba kaketshirtem pusema iba sentong agiogo ta tayongertemi ashi.

CM Lalduhoma-i NEET atema lungkak aiterem pusemer**Aizawl, July 25, 2026**

(Agencies): Mizoram Chief Minister Lalduhoma-i July 24 nü NEET examination paper leak anema lungkak aitba kaketshirtem den külemi noktaka metetdaksüogo.

Lanurtemi medical entrance examination system nung timi aser tashishitsü melii agitsü akhangba nung ozü sorkaria pusema nungiter ta Lalduhoma-i ashi.

Kawrthah North village-i national Clean & Green Panchayat Award anguba atema tenüngsang agütsüba sentong ka

nungjembidang CM Lalduhoma-i NEET paper leaks aiben asüba anema linük ajungalen lungkak aitba indang olen ka ashi.

Aizawl nunga kaketshirtemi tesüiba anogo ananü lungkak aiter ta paisa metetdaksü.

"Onoki asen lanurtem den külemi noktaker. Onoki activist Sonam Wangchuk pusemer aser pa den külemi noktaker, pai iba tebilemtsü asoshi timi movement ka len ania agir" ta CM Lalduhoma-isa ashi.

Külen, BJP Mizoram unit-ia kaketshirtem pusema nungitba aser NEET paper leak asüba ken

o atema timi bushisüngdang asütsü metetdaksüogo.

Kaketshirtemi tim aser tashishitsü maliba competitive examinations akhangtsü temeten peria dang lir aser pamoki lungkak aitba ajanga examination reforms asütsü lenmang lapoktsü ta BJP Mizoram unit-isa ashi.

Prime Minister Narendra Modi-i fast-track courts dena legislative maparen inyaksü aser examination paper leaks nung shilem agirtem ozüng tesashiba agi merenshitsü sangdoktsüba pelashishia agizüker ta BJP unit-isa metetdaksüogo.

NPP-i 2027 Manipur Assembly elections nung kija tokteptsü**Imphal, July 25, 2026**

(Agencies): 2027 Manipur Legislative Assembly election nung National People's Party (NPP) kija dang tokteptsü saka election temer post-poll alliance indang jembitsü ta NPP national president aser Meghalaya Chief Minister Conrad K Sangma-i metetdaksüogo.

Mantripukhri, Imphal nung Manipur NPP office lapoktsüdang CM Conrad-i iba ya ashi.

"Onok sorkar balala nung dena

lir aser teloktep sorkar akümba nung yariteper saka kodang elections ta südir National People's Party-i onok maitsü aser tangatetba nung dang tokteptsü ta onoki shiyonga arur" ta paisa ashi.

"Maitsü, tangatetba, constitution balaka aliba party ka ama onoki 2027 elections tokteptsü" ta Conrad-isa shisem.

"Manipur nung alirtem den ajuruteptsü aser NPP-i Manipur state aser nübortem den külemi noktaka lir, pusema nungiter aser

bilemtsür ta ashitsü atema ni aruogo" ta paisa metetdaksü.

"Manipur nung party office tasen ka lapokba ajanga NPP organisational structure tajungba akümtsü. Asenok ketdangsübaren tajung ka ali nung dang party tajungba bener otettsü" ta Conrad-isa ashi.

NEET examination paper leak atema paisa jungjunga bushisüngdang asütsü aser aibelenertem ozüng tesashi agi merenshitsüla ta paisa ashi.



Northeast India nung ginger lily species tasen ka ngutetba nem Assamese kentener asür Zubeen Garg tenüng jaloktsüogo. Zubeen Garg-i music, cinema aser environmental conservation asoshi shilem tajung agiba atema iba naro tasen nem Hedychium zubeengargianum ta jaloktsüogo. Iba naro ya Zingiberaceae family nung shilem ka lir aser Bongaigaon University kübok Birjhora Mahavidyalaya nungi Dilip Kumar Roy aser Botanical Survey of India (BSI), Shillong nungi Rikertre Lytan o Nripemo Odyuo nungeri bushiteta liasü.

Saudi oil refineries nung khaloktsüba missiles khazüka yok

Syria nung bus ana tsüktep, nisung 35 asü



Social media nung prokshiba aser AFPTV teams-i shidak ta jangjaba UGC video footage ka social media nung prokshiba nungi agizükba noksa ka nung Jizan nung Saudi Aramco refinery amakba nungi mokozü adokba angur.

Athens, Chiteni/July 25 (Agencies): Red Sea anasa Yanbu nung aliba oil refineries dak tenük yoker Honibarnü Yemen nungi ballistic missiles ana khaloktsüba Saudi Arabia indang air defence system ajanga anüng tom nung lia khazüka yok, ta Greek security sources ajanga ashi. Ibai US sepaitemi asendenshir tayimtsü amshia Iran amak tenzüker anogo ka lir ataloker alitsü.

Saudi civil defence ajanga Yanbu atema tekum dangtsü ishíben agüja liasü aser mapang tatsüka lir lendong süyio go ta ashi.

Civil defence-isa south tsütsü Yemen arütsü nungi kilometer 1,000 shi pilar Jizan rongnendak yimti nunga tekum dangtsü sangdonga liasü.

Ketdangsür temi iba lendong nung ki o jen raksaba osang sangdonga mali.

Defence system ya Greek military personnel temi amshia liasü ta osang ajanga ashir. Saudi Arabia indang energy infrastructure kumzüka ayuba nung yaritsü asoshi tezüngzüktep ka kübok Greece-i 2021 nungi Saudi Arabia nung US-i yangluba Patriot air defence battery yua lir.

Ano Honibarnü Greek Patriot system ajangasa Yemen nungi yokba drone ka Yanbu region nung khazüka yok, ta Greek security osang ajanga ashi.

Houthi nunger telungpuri Brehostibarnü Red Sea nung Saudi tankers ana dak amak ta ashiba sülen Hokulbarnü US Tir Donald Trump-i Tehran aser Yemen nung par Houthi tembar

nem temerenshi tulu agütsütsü nangzüka liasü.

Houthi telungpur yagi Yemen north aser western tsütsü amokbanga lir aser parnoki Saudi Arabia indang rong tem nokdangba sangdonga lir.

Gulf nung Strait of Hormuz nung Iran-i nokdanga aliba paidoktsü mechi anogoshi pipeline ajanga Red Sea leni anogoshi toztü barrels million aika abener.

Yemen nung Houthis den rara aruba Saudi-i aniba coalition-i Houthi military sites tem amak ta ashi.

US mitkari Brehostibar aonung aser Hokulbar anepdang Iran nung tayimtsü amshia amak, koba aonung 13 ashidena amakba alitsü, saka Honibarnü US-i amakba osangbo mali.

Rara tembangtsü asoshi khen atema rara anena atatsü züngzüktepa aliba hopta ana tejakdang raksaa US sepitemi southern Iran nung amak, koba Iran-i Strait of Hormuz nung rong senzüba nung timtem agütsüba asoshi langzüba alitsü. Tehran-i tayang kepzüka kidanger Arab linüktem nung US mitkar aliba tesemtem nung amak.

Trump-i Iran indang energy plants aser apu tem amaktsü, toztü bendena aliba Kharg Island agitsü atema ali len sepaitem yoktsü aser Pickaxe Mountain ta ajaba ali telung nung nuclear dak sendakba tesem amaktsü amokmerena lir.

Ajisüaka Hokulbarnü Trump-i tang asendenshir amaktsü atema telemtetba magi lir ta shia liasü.

"Onoki parnok den jembir. Parnoki temulung agütsür ama ni bilemer. Tang ama temulung agütsüba mongudang, saka aji tatem masü," ta pai White House nung osangbener dang pai ashi.

Iran rara tatem kati arutsü kechi tasa lir ta asüngdang dang, "Yangji military exit ka lir, kong onoki tamale ama inyaker, aser onoki dose tesashiba kumdaktsütsü aser par ket nung aliba ajak raksatsütsü. Mesüra tekum dangba tasaji tezüngzüktep yanglutsü ya lir," ta Trump-i ashi.

"Onoki hadir ajak renema lir. Onok aotsü renema lir," ta paisa ashi.

Gulf telungi aiba tongtipang tzü lenmang Strait of Hormuz nungya rangloker ita pongu jungnüa rara arudang nisung meyririjang aika takum samaogo aser toztü jenjang tali akumba ajanga alima nung osettsüset aser rongsenketzüng nunga kongshia lir.

Ano Houthi teloki Red Sea nung mokdangba ajanga iba rara nung tensa tali tamajungba kuma alima nung toztü tebilemtsü tali akumer.

Iba rara tembangtsü asoshi US aser Iran tsüngta jembishinü anendaka aliba asendenshitsü atema China-i nungmesoba sülen Pakistan-i lenmang bushitar ta osangtem ajanga ashir.

Item onükji Iranian Interior Minister Eskandar Momeni-i tan hopta Islamabad semdangba mapang jembia liasü, koba tesüiba anogo ter tsüngta pai Pakistan tanaben semdangba alitsü.



Bordeaux region nung Lacanau aser Saint-Helene yimtsüngtem tsüngta firefighters tem mi remseptsü renemer aliba noksa nung angur. Spain linük nung Bordeaux region nung morok mi tulu adoka aliba mechi Hokulbar aonung nisung meyririjang aika ainshiogo aser iba lendong ajanga tesem balala nung prokshia alir nisung 70,000 ajunger.

Damascus, Chiteni/July 25 (Agencies): Syria linük tiyonglen passenger bus ana tsüktepba nung nisung 35 asü aser aika yiru. Iba lendong ya Palmyra aser Al-Sukhnah yimti tsüngta highway nung atalokba lir.

Iba highway ya Damascus-Dier ez-Zor liasü aser iba lendong atalokba ya kilometer 400 talang lenmang tongtipang ka lir, koba agi linük anüdoklen aser linük yimtiba sendakteper, ta osang ajanga ashir. Iba lendong ajurur alirtem anizüka teyari agütsüba mapang lir.

Syrian Arab News Agency ajanga ashiba agi, yirur alirtem Homs Military Hospital-i anir aotsü atema lendong atalokba tesemi helicopters tem yokogo. Iba lendong atalokba lenmang nung security aser infrastructure tebilemtsü liaka, kanga amshir.

Bus ka nung security forces mena liasü aser ka nung civilian tem mena liasü, ta Ministry of Interior of Syria ajanga sangdong ka nung ashi. Minister of Disaster Management and Emergency Response Raed Al-Saleh-i taküm January ita nungi tenzüka linük nung gari lendong 2,000 jungnüa ataloka lir, ta ashi.

Palmyra aser Al-Sukhnah tsüngta lenmang nung raraba, lenmang majungba aser telungpur inyaksangshi ajanga aiben timtem ajurua arur. Central Syria shilem tuluba sorkar kübok lir, saka region nung mepetmesü tang tashi lir.

Syria nung küm ter shi civil war aliba mechi linük nung transport infrastructure timba jenjang tamajung nung lir. Küm aika senzüka yutsüba, tayimtsü amshia amakba aser anepalu masüba ajanga tongtipang yimtem sendaktepba highways tem raksar rara meliaka senzüsempongtsü tasak kumogo.

Talisa Damascus-Deir ez-Zor highway ya kanga tongtipang lir. Iba lenmang yagi ali rongsen peria aliba eastern provinces aser Damascus nung political aser administrative centre sendakteper. Deir ez-Zor province ya kanga tongtipang lir, kechiaser yangji Syriac Christians indang tekülem ki tejen tem amenoka lir.

Item monasteries ya Roman Empire nung Khristanpur reshikangshiba mapang nungi amenoka liasü. Iba lenmang ya civilian, shishilempar aser security force temi teti amshir.

Iba lenmang nung gari lendong ya teti ajurur aser aiben lenmang raksar aliba aser ozüng shidak mamshiba ajanga ataloker. Emergency services peria mali aser meta talang asüba den lenmang nung security checks aliba ajanga mapang talanglang agir.

Ketdangsür temi asürtem tenüng ano mesangdong aser iba lendong atalokba bushisüngdang tenzüksü imlar, ajisüaka gari kera aniba mesüra driver anibelemba ajanga atalok südi ta bilemer.

Pakistan nung suicide bomber-i nisung 15 pokset



Tank, Chiteni/July 25 (Agencies): Pakistan northwest tsütsü Khyber Pakhtunkhwa province nung takum bendanga agütsür bomb pokloktüba lendong ka nung sepai 12 densema nisung 15 asü, ta mitkartemi Hokulbarnü ashi. Iba sülen counter operation ka nung sepaitemi telungpur 12 tepset ta ashi.

Army temi ashiba agi, iba lendong agütsür yagi aonung Afghan arütsü anasa Tank district nung Manji Khel checkpoint nung tenük yoka liasü. Iba post ya mitkar aser police temi lungjemer ketdang asür.

Telungpur temi mezüngbo checkpoint nungpoka aittsü merang. Aser parnoki nungpoka maittetba sülen parnok rongnung kati tapoktsü oset bena aliba gari ka iba check post temaleni anir arua kanga sashia pokdaktsü, ta mitkari ashi.

Pakistan northwest region nung telungpur temi mapang

shia amakba nung iba ya tesüsa atalokba alitsü, kong ita ishika azüdokshi tali kumogo.

Pakistani Taliban ta ajaba Tehreek-e-Taliban Pakistan (TTP) teloki iba lendong agütsüba tenüng agiogo. Sangdong ka nung parnoki iba inyakyim nung suicide bombers pezü liasü ta ashi.

TTP yagi 2007 küm nungi Pakistan sorkar anema lendong balala agüja arur. Parnok yagi linük nung tang aliba system ya parnoki Islamic law nungi agizükba system agi melenner ta ashir.

Telungpur tem kidanger Afghanistan linük nung jenoker amaktsü sentong yanglua aser renemba sülen arütsü alema aita azüdokshir ta Pakistan-i mapang talangka nungi tai tonglokja arur. Ajisüaka Kabul nung aliba Taliban administration-i aji magizüker aser Pakistan security tebilemtsü ya par linük telungzüik indang lir ta ashir.

2 buba CDFA League cum Rokonicha Champions trophy tenzükogo



Chümoukedima District Football Association ajanga ayongzükba 2 buba CDFA League cum Rokonicha Champions trophy tenzükba mapang tangokba noksa ka nung sentong akhumdong Advisor, Youth Resources and Sports, Nagaland, S Keoshu Yimchunger den asayamung ketdangsür aser asayartem angur.

Dimapur, Chiteni/July 25 (TYO): Chümoukedima District Football Association ajanga ayongzükba 2 buba CDFA League cum Rokonicha Champions trophy Honibar nikongdang Chümoukedima Football Ground nung tenzükogo.

Iba sentong akhumdong, Advisor, Youth Resources and Sports, Nagaland, S Keoshu Yimchunger-i jembidang, department-i talent hunts ajanga sempet tajung aliba kaketshir 35 nungi 37 tsüngta shima sports hostels nung ayur, aser ibaji ajanga parnoki state tenüng nung Under-15 aser Under-16 categories nung national aser Northeast asayamung balala

nung shilem agia asayar, ta ashi.

Küm shia department-i sempet akaba asayar tem bendang limai yoker. Parnok ya tanga lima nung training agitsü, shisatsü ulushitsü atema academies tajung temi yoker. Item policies meteta department den teka amteptsü aser tejakleni aotsü mangdang ayutsüla, ta pai ashi.

Asen state nungi asayartem tarutsü tia tajung lir. Parnoki pei careers nung tejakleni renloka aotsü atema shisatsü nüngdaker, ta Advisor Keoshu-i ashi.

Asen associations aser organizing committees temi adenshia anogo 6-7 football asayar trophy agüja sentong tembangtsü kisung

mebilemtsüla, ta pai ashi.

Junga osang agitepa iba sapang ya amshia tarutsü putu tejakleni anir aotsü asoshi bilema inyaktsüla, ta ashi.

Tanü iba asayamung ayongzükba mapang teimla akaba asayartem anishiang, shimang aser soita yuang.

Tarutsü Naga nung saisapong aser football ya Under-15, Under-16, Under-17 aser Under-18 nung lir. Asenoki parnok nem temulung agütsütsüla aser parnok tarutsü yangertsütsüla, aser künü parnoki asen state asoshi tenüng tajung bener arutsütsü ta ni amanger aser ibaji ni asayamung ayonger dang ayongzüker, ta pai ashi.

Japan forward Maeda-i Ipswich nungi asayatsü

Tokyo, Chiteni/July 25 (Agencies): Ipswich Town-i küm asem contract nung Celtic nungi Japan forward Daizen Maeda anir aruogo.

Arishi küm 28 tain Maeda ya sen £10m agi züngzüktepa Premier League nung asayatsü ta angazüker, shiba 2026 FIFA World Cup nunga par linük tenüng nung asaya liasü aser last 32 nung Brazil-i tsükdakja liasü.

Maeda ya Celtic nungi 212 ben asayaba nung goal 79 agüja lir, kong pai league titles pongu, Scottish Cups asem aser League cups ana kokteta liasü.

"Ni teti Premier League nung asayanüa liasü aser iba club nungi iba pongmang asangsang kumtetba asoshi ni kanga pelar," ta Maeda-i Ipswich indang website nung ashi.

"Ni club den jangratema sensaksemogo aser parnoki ni nungnanga melie pelashishia agizükba ama angatetdaksü."

"Teti kü indang nükjidongji meranga raratsü, goal agütsütsü aser kü team asoshi assists agütsütsü alitsü - Ni teti asemtsü aser ni akaba ajak agütsütsü," ta pai ashi.

Kieran McKenna-i yutsüba sülen Ipswich manager akumdang Gary O'Neil-i Maeda ya pa indang squad nung jenjang aketba züngsem ka asütsü amanger, ta ashi.

Ipswich nungya Maeda den defender Issa Diop, winger Abdul Fatawu, striker Emersonn aser goalkeeper Kayne van Oevelen nungertem asayar tasen alitsü.

Iba den defender Cedric Kiper aser forward Chuba Akpom na taoba season loans nung asayaba sülen teti asoshi züngzüktepogo.

Social media post ka nung Maeda-i, Celtic nung tesüiba küm pezü ser tesadang ya kü career aser kü takum nung tongtipangtiba chapter ka liasü, ta ashi.

"Iba bagde inokba, iba club tajung asoshi asayaba aser külen asayar, staff aser aliba nung supporters tajungtiba den amadoktsü makokba tatalokba aika lemsateptsü maongka anguba ya tetushi ulura liasü," ta pai ashi.

"Ni junga aser mejungi aliba mapang kü den nokdakba atema kanga pelar."

October ita Kolkata nung Brazil international friendly asayatsü jembir

Kolkata, Chiteni/July 25 (Agencies): Brazil nung tebur football team ya küm tatemlen India nung international friendly asayatsü akok.

Hokulbarnü ESPN Brasil osang ka ajanga ashiba agi, Brazilian Football Confederation (CBF) ya 2026 FIFA World Cup sülen mezügbuba FIFA international window atema asayatsü sentong renemogo. September 25 nü Townsville aser September 29 nü Brisbane nung Australia den friendlies asayaba sülen CBF ya India nung October ita asaya tasembuba atema jembishinür ta angazüker.

Osang ajanga ashiba agi iba asaya ya Kolkata nung asayatsü imlar, kong taoba mapanga 2011 küm Lionel Messi densema Argentina aser Venezuela tsüngta asaya liasü.

Brazilian Football Confederation (CBF) aser sentong ayongertem tsüngta jembishinü ya 2026 FIFA World Cup mapang tenzük ta ashir, kong Indian fans temi Brazil kanga bhukuma liasü. Iba asayamung mapang region nung Selecao nung kanga sapuba ajanga jembishinü ya tenzük ta ashir.

ESPN Brasil ajanga ashiba agi, iba fixtures ya FIFA indang 'Super International Window' tasenba nung shilem ka lir, koba ajanga national teams temi anogo 16 tsüngta competitive aser friendly densema asaya

pezü tashi asayatsü melar. Iba international calendar tasenba nungya March, June windows balaka, September-October meyokteper window ka aser November nung ka dena lir.

Osang ajangasa ashiba agi, CBF-i 2027 nungi tenzuka Brazil nung international friendlies asaya tali akumtsü nükjidong lir, kong Selecao matches kangabo masayaba yimtitem nunga national team anir oa asayaba nung rangloker.

2026 FIFA World Cup nung Brazil junga shilem magiteti asaya pongu nungi asem dang akok aser New York New Jersey Stadium nung Round pf 16 asaya nung Norway-i 2-1 agi tsükdaksü.

Iba tamakok ya ajanga ponguben iba asayamung koka aliba telok ya kanga aritepa asayamung nungi meyipa aotsüsa akum.

Iba asayamung nungi Brazil tsükba sülen linük nung tebur international football nung goal timtiba agüja alisang Neymar Jr. ya international football nungi anisüngzükba sangdonga liasü.

2026 FIFA World Cup nung Brazil nung rongnungi Vinicius Jr.-i goal timtiba (pongu) agütsüteta liasü. Manchester United nung forward asayasang Matheus Cunha-ia goal asem agütsü. Casemiro, Gabriel Martinelli aser Neymar nungeri goal ka agüja liasü.

Revenant FC (A)-i mezügbuba High School Futsal Tournament benogo



Champion team Revenant FC

Mokokchung, 24th July (TYO): 35+ MFL-i ayonga mezügbuba High School Futsal Tournament July 22 nungi 24th July tashi Mokokchung Mojabi Futsal turf nung asaya mungogo. Iba asayamung nung telok 27-i shilem agia liasü.

Final match nung Revenant FC (A) aser Eden School na asayaba, Revenant-i 10-1 agi Eden madak takok tulu nguteta taküm iba asayamung marok parnoki benogo. Tasembuba jenjang United Boys FC-i angu.

Nija senpet agizükertemji - Mr. Langa (Revenant FC)-i Player of the Tournament Award, Mr. Imliwar (Revenant

FC)-i Highest Scorer Award (pai goal 11 idaktsü), Mr. Nungshilong (GMS Tongdentsuyong)-i Best Defender Award, Mr. Metsuro (Revenant FC) aser Mr. Lensar (KSA) nadi Most Promising Players Award aser Mr. Badal (Revenant FC)-i Best Goalkeeper Award agizük.

Takok angur telok aser kija ajak nem trophy den sen aser kulikaket senpettsü. Asayamung shibangba sentong nung tetushi tejaoker N. Chuba Phom-i jembidang, 35+ MFL ajanga lapoktsüba maongka tajung agia shilem agiba asoshi lanurtem dang pelaba

metetdaksü. Lanurtem ajungmesotsü asoshi maparen tulu inyakba asoshi pai tayongertem nema tenügsang agütsü. Pai shilem agir ajak dang takok mesüra tamakok nguaka arok khuret agiba dak alaka shinga nema tai magütsütsü ayongzük.

Chuba Phom-isa, arishi küm nung ochi mashi mapa meinyaki pei sasa dak tamang kateta tarutsü putu dang tatishitsü tajung sayutsü ajungshi. Pai lanurtem dang asüküm aser yimya tamajung nungi pila-a alitsü saka ajemalu aser tashi itta alitsü asoshi ajungshia liasü.

BILEMDANGANG

"Tajungba akumtsü asoshi melenshir, aiben melenshiba ajanga tali abensar."